



**JUDICIAL SYSTEM MONITORING PROGRAMME  
PROGRAMA MONITORIZASAUN SISTEMA JUDISIÁL**

**Sumáriu Kazu**

**Tribunál Judisiál Primeria Instánsia Baucau**

**Janeiru 2023**

**Afirmasaun:** Sumáriu Kazu tuir mai ne'e deskreve faktu sira no prosesu iha Tribunál tuir JSMP nia monitorizasaun independente, no deklarasaun ne'ebé parte sira fó iha Tribunál nia laran. Informasaun ne'e la reprezenta JSMP nia hanoin hanesan instituisaun ida.

JSMP kondena maka'as forma violénsia hotu-hotu, liuliu hasoru fetu no ema vulneravel. JSMP afirma la iha justifikasaun ba kualkér violénsia hasoru fetu.

**A. Sumáriu prosesu julgamentu kazu iha Tribunál Judisiál Primeria Instánsia Baukau**

**1. Totál kazu ne'ebé JSMP monitoriza: 16**

<b>Artigu</b>	<b>Tipu Kazu</b>	<b>Númeru</b>
Artigu 145 Kódigu Penál (KP) & artigu 2, 3, no 35 letra (b) Lei Kontra Violénsia Doméstika (LKVD)	Ofensa ba integridade física simples ho natureza violénsia doméstika (artigu 2 kona-ba konseitu violénsia doméstika, artigu 3 kona-ba relasaun família, artigu 35 kona-ba tipu krime violénsia doméstika (VD) sira no artigu 36 kona-ba krime sira violénsia doméstika nian hanesan krime públiku)	3
Artigu 139 (KP), artigu 2, 3, no 35 letra (b) (LKVD)	Omisídiu agravadu ho natureza violénsia doméstika	2
Artigu 177 KP	Abuzu seksuál ba menór	1
Artigu 262 KP, artigu 258 KP & 157 KP	Alterasaun ba marku, danu simples no ameasa	1
Artigu 227 KP, artigu Artigu 20 (1), artigu 2 (2 alinea f) Lei Arma Brankas	Omisaun ba ausíliu no arma brankas	1
Artigu 139 (KP), artigu 2, 3, no 35 letra (b) (LKVD) & Artigu 20 (1), artigu 2 (2 alinea f) Lei Arma Brankas	Omisídiu agravadu ho natureza violénsia doméstika no arma brankas	1

Artigu 146 KP & Artigu 20 (1), artigu 2 (2 alinea f) Lei Arma Brankas	Ofensa ba integridade fízika grave no arma brankas	1
Artigu 157 KP & Artigu 20 (1), artigu 2 (2 alinea f) Lei Arma Brankas	Ameasa no arma brankas	1
Artigu 145 KP	Ofensa ba integridade fízika simples	1
Artigu 146 (e) KP & artigu 145 KP	Ofensa ba integridade fízika grave no ofensa ba integridade fízika simples	1
Artigu 146 (a) KP & Artigu 19, Lei Arma Brankas	Ofensa ba integridade fízika grave no uzu rama ambon	1
Artigu 138 KP, 139 KP, 23 KP no 24 KP	Tentativa omisídiu simples no omisídiu agravadu	1
Artigu 259 KP & artigu 157 KP	Danu agravadu no ameasa	1
<b>Totál</b>		<b>16</b>

## 2. Totál desizaun ne'ebé JSMP monitoriza: 5

Tipu desizaun	Artigu	Númeru
Prizaun	66 KP	1
Suspensaun ba prizaun nia ezekusaun	68 KP	3
Omologa dezisténsia keixa	262 KPP	1
<b>Totál</b>		<b>5</b>

## 3. Totál kazu sira ne'ebé adia tuir JSMP nia monitorizasaun: 0

## 4. Totál kazu ne'ebé sei kontinua prosesu tuir JSMP nia monitorizasaun: 11

### B. Deskrisaun sumáriu julgamentu ba desizaun kazu sira

#### 1. Krime ofensa ba integridade fízika simples ho natureza violénsia doméstika

Nú. Prosesu : 0055/19. LASIC  
 Kompozisaun Tribunál : Singulár  
 Juis : Dra. Jumiaty Maria Freitas  
 Prokuradór : Dr. Bartolomeu de Araújo  
 Defeza : Dr. Sidonio Maria Sarmiento  
 Desizaun : Pena prizaun tinan 1 suspende ba tinan 1

Iha 23 Janeiro 2023, Tribunál Judisiál Primeria Instánsia Baukau prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu YDC (*edital*) hasoru nia feen, iha Munisípiu Lautein.

### **Akuzasaun Prokuradór**

Prokuradór akuza katak iha 06 Jullu 2019, iha oras tuku 16:00 lokraik, arguidu lori tudik ameasa lezada. Antes agresaun ne'e, arguidu deskonfia lezada amante (selingkuh) ho mane seluk.

Tuir mai iha 07 Jullu 2019, iha oras tuku 08:00 dadeer, arguidu basa dala lima iha lezada nia ulun rezulta moras no bubu. Antes agresaun ne'e, arguidu deskonfia lezada amante (selingkuh) ho mane seluk.

Prokuradór akuza arguidu kontra artigu 145 KP kona-ba ofensa ba integridade fízika simples ho nia moldura penál to'o tinan 3 ka multa konjuga ho artigu 2, 3, 35 no 36 LKVD.

### **Produsaun ba prova sira**

Iha julgamentu produsaun ba prova ne'e, tribunál labele rona arguidu ninia deklarasaun, tanba arguidu edital.

Alende ne'e, lezada kontinua konfirma faktu hotu iha akuzasaun no deklara katak depoisde akontesementu ne'e sira diak malu fali. Iha tinan 2020, arguidu sai husi uma ba hola fali feto seluk to'o agora. Kazu ne'e akontese tanba arguidu deskonfia lezada ba mane seluk.

### **Alegasaun finál**

Prokuradór haktuir katak iha produsaun ba prova sein prezensa arguidu maibé lezada nafatin deklara faktu sira iha akuzasaun mezmu sira moris separa ona, maibé prokuradór nafatin husu ba tribunál atu kondena arguidu ho pena prizaun fulan tolu suspende ba tinan ida, atu evita arguidu komete tan krime hanesan iha futuru.

Enkuantu defeza husu ba tribunál atu kondena arguidu ho pena ne'ebé adekuadu.

### **Desizaun**

Depoisde avalia faktu hotu, tribunál prova katak arguidu basa dala lima iha lezada nia ulun. Enkuantu kona-ba krime ameasa antes ne'e lezada dezisté ona iha ministériu públiku.

Bazeia ba faktu provadu hirak ne'e, tribunál konklui prosesu ne'e no kondena arguidu ho pena prizaun tinan ida suspende ba tinan ida.

## **2. Krime ofensa ba integridade fízika simples ho natureza violénsia doméstika**

Nú. Prosesu : 0012/20.LALMR  
Kompozisaun Tribunál : Singulár

Rua Beco Lakateu, Aldeia Manu fuik, Suku Kolmera, Administrativu Vera Cruz  
Munisípiu Dili, Timor-Leste  
P.O Box ; 275 . Tlp 3323883

Website: [www.jsmp.tl](http://www.jsmp.tl) no facebook: [www.facebook.com/jsmp.timorleste](https://www.facebook.com/jsmp.timorleste)

Juis : Dra. Maria Modesta Viera  
Prokuradór : Dr. Ambrosio Rangel Freitas  
Defeza : Dr. Germano Guterres Ramos  
Desizaun : Pena prizaun tinan 1 suspende ba tinan 1

Iha 23 Janeiro 2023, Tribunál Judisiál Primeria Instánsia Baucau prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu AC (nu'udar la'en), MC (nu'udar banin) no MLdG (nu'udar kuñadu) hasoru lezada MF, iha Munisípiu Lautein.

### **Akuzasaun Prokuradór**

Prokuradór akuza katak iha 10 Outubru 2020, iha oras ne'ebé la apura, arguidu AC basa dala ida iha lezada nia hasan parte loos, arguidu MC silu lezada nia liman no arguidu MLdG buti dala rua iha lezada nia kakorok. Antes agresau ne'e, arguidu ho lezada diskute malu kona-ba lezada haruka arguidu AC atu ba deve kafe ho masin midar iha kioske hodi lori ba lia, maibé arguidu lakohi ba, ho nune'e mosu agresau ne'e.

### **Produsaun ba prova sira**

Iha julgamentu arguidu MLdG deklara katak tanba lezada ho arguidu AC diskute malu kona-ba labarik no dada ba mai labarik ne'e mak arguidu baku ses tiha lezada nia liman la'os buti lezada nia kakorok,

Arguidu AC deklara katak faktu hotu iha akuzasaun ne'e loos hotu, depoisde akontese sira diak malu ona, arrepende ona ninia hahalok, foin primeiravés mai hatan iha tribunál.

Arguidu MC deklara katak faktu hotu iha akuzasaun ne'e loos hotu, depoisde akontesementu ne'e sira di'ka malu ona, arrepende ona ninia hahalok, foin primeiravés mai hatan iha tribunál.

Alende ne'e, lezada kontinua konfirma faktu hotu iha akuzasaun no deklara katak depoisde akontesementu ne'e diak malu ona ho arguidu sira.

### **Alegasaun finál**

Prokuradór iha nia alegasaun konsidera arguidu sira provadu komete krime hasoru lezada, mezmu arguidu MLdG koko atu nega faktu hotu iha akuzasaun maibé arguidu MC no arguidu AC konfesa faktu hotu iha akuzasaun no konfirma mós husi lezada. Tanba ne'e husu ba tribunál atu kondena arguidu ba pena prizaun fulan neen suspende ba tinan ida.

Entretantu defeza haktuir katak arguidu MLdG deklara deit faktu ne'ebé nia komete no arguidu AC no MC konfesa integralmente ba faktu hotu iha akuzasaun, arrepende ona sira nia hahalok, di'ak malu ona ho lezada no arguidu sira foin primeiravés mai hatan iha tribunál, nune'e husu ba tribunál atu kondena arguidu sira ho pena ne'ebé kmaan.

## **Desizaun**

Depoisde avalia faktu hotu, tribunál prova katak arguidu AC basa dala ida iha lezada nia hasan parte loos, arguidu MC silu lezada nia liman no arguidu MLdG buti dala rua iha lezada nia kakorok.

Bazeia ba faktu provadu hirak ne'e hotu no tetu mós ho sirkunstánsia atenuante sira hanesan arguidu nain rua konfesa, foin primeiravés mai hatan iha tribunál, arrepende ona sira ninia hahalok, diak malu ona ho lezada, nune'e tribunál konklui prosesu ne'e no kondena arguidu sira ho pena prizaun tinan ida suspende ba tinan ida.

### **3. Krime abuzu seksuál ba menór**

Nú. Prosesu : 0005/19. LALRO  
Kompozisaun Tribunál : Kolektivu  
Juis : Dra. Maria Modesta, Dra. Jumiaty Maria Freitas no Dr. Evangelino Belo  
Prokuradór : Dr. Nelson de Carvalho  
Defeza : Dr. Sidonio Maria Sarmiento  
Dezisaun : Pena prizaun tinan 8

Iha 25 Janeiru 2023, Tribunál Judisiál Primeria Instánsia Baucau prezide julgamentu leitura akordaun ba krime abuzu seksuál ba menór ne'ebé envolve arguidu JH hasoru lezada (idade tinan 12 fulan 1), iha Munisípiu Lautein.

### **Akuzasaun Prokuradór**

Prokuradór akuza katak iha 23 Maiu 2019, iha oras tuku 09:00 dadeer, lezada hela mesak iha uma arguidu ba iha lezada nia uma hodi bolu lezada ba arguidu nia uma, ho nune'e lezada ba arguidu nia uma tanba entre sira sempre la'ó ba mai no dala ruma lezada halimar iha arguidu nia uma. Bainhira lezada to'o iha arguidu nia uma arguidu haruka lezada tama ba uma laran no tama liu ba arguidu nia kuartu laran. Arguidu tama tuir lezada hodi halo relasaun seksuál ho lezada. Depoisde arguidu haruka lezada hatais fali nia roupa. Lezada ho tanis halai tuir ba lezada nia inan aman ne'ebé iha hela rate. Lezada seidauk too iha rate hasoru testemuña FF no lezada konta tuir akontesementu ne'e ba testemuña. Bainhira konta hotu testemuña kontaktu lezada nia inan ho aman maibé la tama no bainhira lezada nia inan ho aman fila husi rate mak testemuña konta tuir ba lezada nia inan aman hodi ba hato'o keixa iha polísia.

Antes ne'e iha data no fulan ne'ebé la apura maibé iha tinan 2019, arguidu mós halo relasaun seksuál ho lezada.

Prokuradór akuza arguidu kontra artigu177 (1) KP kona-ba abuzu seksuál ba menór ho moldura penál tinan 5 to'o tinan 20.

### **Produsaun ba prova sira**

Rua Beco Lakateu, Aldeia Manu fuik, Suku Kolmera, Administrativu Vera Cruz  
Munisípiu Dili, Timor-Leste  
P.O Box ; 275 . Tlp 3323883

Website: [www.jsmp.tl](http://www.jsmp.tl) no facebook: [www.facebook.com/jsmp.timorleste](https://www.facebook.com/jsmp.timorleste)

Iha prosesu julgamentu, arguidu nega totalmente ba faktu hotu iha akuzasun, mezmu nune'e arguidu rekuñese sira viziñu, iha 23 Maiu 2019, arguidu ba halo rate hahú husi tuku 09:00 dadeer to'o 18:00 lokraik, hamutuk ho testemuña TP no AP, arguidu nu'udar kaben nain no iha oan nain lima.

Entretantu lezada kontinua konfirma faktu hotu iha akuzasaun no deklarata katak mós katak antes ne'e iha data no fulan ne'ebé lezada haluha ona, maibé iha tinan 2019, arguidu mós halo relasaun seksuál ho lezada, maibé lezada la hato'o ba lezada nia inan aman, tanba lezada tauk.

Testemuña FF nu'udar lezada nia prima depoimenta katak momentu ne'e testemuña ba dulas batar mak haree lezada tanis, nune'e testemuña husu lezada mak lezada konta tuir arguidu nia aktu ne'e ba testemuña, nune'e testemuña kontaktu kedas lezada nia inan ho aman maibé la tama no testemuña bolu lezada ba nia uma bainhira lezada nia inan ho aman fila husi rate mak foin testemuña informa aktu ne'e ba lezada nia inan ho aman.

testemuña JRN nu'udar lezada nia inan depoimenta katak momentu fila husi halo rate mak testemuña FF konta arguidu nia aktu ne'e, testemuña mós deklarata katak antes ba haree ema halo rate haree arguidu tuur iha dalan besik testemuña nia uma, testemuña la ba liu rate maibé sei liu husi família nia uma hafoin ba rate, bainhira to'o iha rate meudia ona no testemuña haree arguidu iha uluk ona rate.

Testemuña TP la iha relasaun família ho arguidu no lezada, testemuña depoimentu katak momentu ba halo rate ne'e, testemuña foin haree arguidu bainhira sira han meudia nian.

Testemuña AP la iha relasaun família ho arguidu no lezada depoimentu katak momentu ba halo rate foin haree arguidu bainhira sira han meudia.

### **Alegasaun finál**

Prokuradór haktuir katak iha produsaun ba prova arguidu nega totalmente ba faktu hotu iha akuzasaun, mezmu nune'e lezada konfesa faktu hotu iha akuzasaun no testemuña sira mós depoimenta katak foin haree arguidu iha rate bainhira sira han meudia, nune'e prokuradór konklui katak arguidu halo tiha relasaun seksuál ho lezada mak foin ba rate. Arguidu nia aktu ne'e halo lezada sente moe nune'e arguidu tenki simu konsekuensia ba nia aktu ne'e. Tanba ne'e husu ba tribunál atu kondena arguidu ho pena prizaun tinan sanulu resin lima.

Entretantu defeza haktuir katak bazeia ba produsaun ba prova ne'ebe produs iha audensia julgamentu, defeza husu ba tribunál tatu tau krebilidade ba arguidu nia deklarasaun katak nia la halo aktu ne'e hasoru lezada. Tanba ne'e husu ba tribunál absolve arguidu husi prosesu ne'e karik tribunál iha hanoin seluk aplika pena ne'ebé justu ba arguidu.

### **Desizaun**

Rua Beco Lakateu, Aldeia Manu fuik, Suku Kolmera, Administrativu Vera Cruz  
Munisípiu Dili, Timor-Leste  
P.O Box ; 275 . Tlp 3323883

Website: [www.jsmp.tl](http://www.jsmp.tl) no facebook: [www.facebook.com/jsmp.timorleste](https://www.facebook.com/jsmp.timorleste)

Depoisde avalia faktu hotu, tribunál prova katak bainhira lezada to'o iha arguidu nia uma arguidu haruka lezada tama ba uma laran no tama liu ba arguidu nia kuartu laran. Arguidu tama tuir lezada hodi halo relasaun seksuál ho lezada. Depoisde halo tiha relasaun seksuál ho lezada, arguidu haruka lezada hatais fali lezada nia roupa. Prova mós katak iha loron no fulan ne'ebé lezada haluha ona maibé iha tinan 2019, arguidu mós halo relasaun seksuál ho lezada.

Bazeia ba faktu provadu sira ne'e no tetu mós ho sirkunstánsia atenuante sira hanesan, arguidu foin primeiravés mai hatan iha tribunál, nune'e tribunál konklui prosesu ne'e no kondena arguidu ho pena prizaun tinan ualu.

#### **4. Krime alterasaun ba marku, ameasa no danu simples**

Nú. Prosesu : 0007/20.BCBCV  
Kompozisaun Tribunál : Singulár  
Juis : Dr. Evangelino Belo  
Prokuradór : Dr. Bartolomeu de Araújo  
Defeza : Dr. Antonio Fernandes  
Desizaun : Omologa pedidu dezisténsia keixa

Iha 30 Janeiro 2023, Tribunál Judisiál Primeria Instánsia Baukau prezide Julgamentu tentativa konsiliaun ba krime alterasaun ba marku, ameasa no danu simples ne'ebé envolve arguidu Vicente Fernandes, Diamantino Hernesto Soares hasoru lezadu Abarao Guterres de Oliveira, iha Suku Tirilolo, Postu Administrativu Baucau Villa, Munisípiu Baukau.

#### **Akuzasaun prokuradór**

Prokuradór akuza katk iha loron 24 Novembru 2018, lezadu ho autoridade sira husi suku Buibau ba sukat baliza rai ho to'os arguidu nian iha Aldeia Lutu-mutu RSS nian, maibé liu tiha semana rua, arguidu ba sobu hotu tiha estaka ne'ebé autoridade ho lezadu tau iha baliza rai refere no arguidu Vicente kuda hudi besik lezada nia uma tatis.

Tuir mai iha 16 Jullu 2022, arguidu Diamantino ameasa lezadu bainhira lezadu ba fó han fahi iha fahi luhan.

Iha 7 Agosto 2022, arguidu Diamantino tuda lezadu nia uma to'o kalen kuak.

Prokuradór akuza arguidu sira kontra artigu 262 KP kona ba alterasaun ba marku ho moldura penál too tinan 1 ka multa, artigu 258 KP kona-ba danu simples ho moldura penál too tinan 3 ka multa no artigu 157 KP kona-ba ameasa ho moldura penál too tinan 1 ka multa.

#### **Prosesu tetantiva konsiliaun**

Rua Beco Lakateu, Aldeia Manu fuik, Suku Kolmera, Administrativu Vera Cruz  
Munisípiu Dili, Timor-Leste  
P.O Box ; 275 . Tlp 3323883

Website: [www.jsmp.tl](http://www.jsmp.tl) no facebook: [www.facebook.com/jsmp.timorleste](https://www.facebook.com/jsmp.timorleste)

Baziea ba artigu 262 Nú.1 Kódigu Prosesu Penál kona-ba tentativa ba konsiliaun, nune'e antes tama ba julgamentu produsaun ba prova, juis husu atu halo tentativa konsiliaun ba arguidu no lezada.

Iha prosesu tentativa konsiliaun ne'e, lezadu hakarak dame malu ho arguidu sira, nune'e arguidu sira mós aseita ho pedidu ne'e.

### **Alegasaun finál**

Prokuradór ho defeza apresia akordu dame ne'ebé parte rua konkorda ona no husu ba tribunál atu omologa pedidu dezisténsia keixa ne'e.

### **Desizaun**

Bazeia ba akordu dame husi parte rua no pedidu dezisténsia husi lezada, nune'e tribunál konklui prosesu ne'e no omologa akordu dame entre parte sira.

## **5. Krime prátika ilisitu arte marsiais no omisaun ba ausillu**

Nú. Prosesu : 0056/18.MNMNT  
Kopozisaun Tribunál : Singulár  
Juis : Dra. Jumiaty Maria Freitas  
Prokuradór : Dr. Ambrosio Rangel Freitas  
Defeza : Dr. Gil Amaral (advogadu privadu)  
Desizaun : Pena prizaun tinan 1 suspende ba tinan 1, ba arguidu MO, AdS no arguidu PS no pena prizaun tinan 2 supende ba tinan tinan 2 ba arguidu CS.

Iha 30 Janeiro 2023, Tribunál Judisiál Primeria Instánsia Baucau prezide julgamentu leitura sentensa ba krime pratika ilisitu arte marsiais no omisaun ba ausillu ne'ebé envolve arguidu Camilo Soares, Mario Orlando, Antonio da Silva no Paul Soares hasoru Estadu RDTL, iha Munisípiu Manatuto.

### **Akuzasaun Prokuradór**

Prokurador akuza katak Iha 26 Setembru 2018, iha oras ne'ebé la apura, arguidu Camilo ba iha Aldeia Kakaeuma, Suku Aubion hodi fó hatene ba arguidu Mario no vítima matebian Epifanio atu hatama osan ho montante US\$5.00 hodi hala'o aktividade pengesahan warga IKS ne'ebé sei realiza iha lora 06 Outubru 2018.

Tuir mai iha 06 Outubru 2018, iha oras ne'ebé la apura, arguidu Mario Orlando, Antonio da Silva no Paul Soares no vítima matebian Epifanio ba serimonia fatin iha ai-bubur laran iha Mota Bituduk, Aldeia Tuketin, Suku Kribas, bainhira to'o arguidu Camilo hasoru sira no basa sira nain haat depois haruka sira para motor iha ai-bubur laran hodi partisipa iha

sermonia, arguidu nain tolu ho vítima matebian mós halo tuir no arguidu Camilo fó atensaun ba sira katak keta lao ba mai tanba rai naruk.

Iha kalan refere maiszumenus oras tuku 20:00 kalan, derepenti deit kareta ida liu, nune'e arguidu Antonio da Silva hakilar dehan polísia, ho nune'e sira nain haat hamrik hodi halai subar arguidu Mario Orlando arguidu Antonio da Silva, vítima matebian Epifanio halai uluk no arguidu Paul Soares halai tuir husi sira nia kotuk tanba kondissaun ladun diak. Hakfodak arguidu Mario Orlando, arguidu Antonio da Silva no vítima matebian Epifanio monu tiha ba rai naruk ho nia rezultadu arguidu Mario Orlando monu ain rua naksalak no ain parte loos bubu no kanek. Arguidu Antonio da Silva monu rezulta kanotak naksalak no bubu no vítima matebian Epifanio hetan pankada maka'as iha parte hirus matan rezulta hakotu nia i'is.

Arguidu Mario Orlando nia raan sai barak nune'e arguidu Camilo tula ba klinika maibé arguidu Antonio da Silva ho vítima Epifanio deskansa deit iha uma. Ho ida ne'e iha loron 07 Outubru 2018, maizumenus iha oras tuku 02:00 madrugada, vítima Epifanio Herman Gomes hakotu is ka mate.

Prokuradór akuza arguidu sira kontra artigu 227 KP kona-ba omisaun ba ausíliu ho moldura penál too tinan 1 ka multa no artigu 24 (1 ) Lei Arma brankas.

### **Produsaun ba prova sira**

Iha produsaun ba prova arguidu konfesa integralmente ba faktu hotu iha akuzasaun, no deklarata katak nia mak responsavel arte marsiais iha kribas. Arguidu deklarata la tula vítima matebian Epifanio ba ospítal tanba arguidu husu vítima hatan diak hela ladun moras, no grupu arte marsiais IKS kontribui osan ba matebian nia família hamutuk US\$1,000.00.

Arguidu Mario Orlando deklarata katak arguidu sira seidak to'o iha fatin serimonia akontese uluk ona, nune'e arguidu nia kolega sira mak dada sai arguidu sira husi rai kuak.

Arguidu Antonio da costa deklarata mós katak kolega sira hasai sira nain tolu husi rai naruk no ba iha arguidu Camilo nia uma.

Arguidu Paul soares deklarata katak iha akontesementu ne'e atu ba asiste deit serimonia graduasaun no ami nain haat uza roupa sivil hotu, no serimonia graduasaun ba membru foun sira ami nain haat hatama hotu osan US\$5.00, nune'e arguidu deklarata katak nia la monu ba rai naruk tanba la hatete fatin ne'e no arguidu Antonio hakilar ba sira nain tolu la rona halai nafatin mak monu tiha ba rai naruk.

### **Alegasaun finál**

Prokuradór konsidera arguidu sira provadu komete krime, bazeia ba konfisaun arguidu sira nian, nune'e husu ba tribunál atu kondena arguidu sira ho pena prizaun tinan ida suspende ba tinan ida.

Entretantu defeza husu tribunál aplika pena ne'ebé adekuadu ba arguidu sira no arguidu Camilo iha tempu ne'e ho intensaun diak atu lori vítima ba ospital maibé vítima mak hatan dehan diak hela.

### **Desizaun**

Depoisde avalia faktu hotu, tribunál prova katak arguidu Mario Orlando, Antonio da Silva no Paul Soares, provadu komete krime prátika ilísitiu arte marsiais, arguidu Camilo Soares prátika krime omisaun ba ausillu no krime prátika ilísitiu arte marsiais.

Bazeia ba faktu provadu sira ne'e tribunál tetu mós ho sirkunstánsia atenuante sira hanesan, arguidu sira konfesa integralmente ba faktu hotu iha akuzasaun, ajuda ona serimonia funeral vítima nian, ho nune'e tribunál konklui prosesu ne'e no kondena arguidu Mario Orlando, Antonio da Silva no Paul Soares ho pena prizaun tinan ida suspende ba tinan ida. Etretantu ba arguidu Camilo Soares tribunál kondena pratika krime ilísitiu arte marsiais ho pena prizaun tinan ida fulan neen suspende ba tinan ida, no kondena arguidu ba iha krime omisaun ba ausillu ho pena prizaun tinan rua suspende ba tinan rua, tribunál halo komulasaun juridiku hodi aplika pena únika ba arguidu Mario Orlando, Antonio da Silva no Paul Soares ho pena prizaun tinan ida suspende ba tinan ida no ba arguidu Camilo Soares ho pena prizaun tinan rua suspende ba tinan rua no selu kustu judisiáriu kada arguidu US\$10.00.

Atu hetan informasaun kompleitu, favór kontaktu:

Ana Paula Marçal

Diretora Ezekutiva JSMP

Diresaun e-mail: [ana@jsmp.tl](mailto:ana@jsmp.tl)

Telefone: (+670) 33238883 | 77040735

Website: <https://jsmp.tl>

[info@jsmp.tl](mailto:info@jsmp.tl)

Rua Beco Lakateu, Aldeia Manu fuik, Suku Kolmera, Administrativu Vera Cruz

Munisípiu Dili, Timor-Leste

P.O Box ; 275 . Tlp 3323883

Website: [www.jsmp.tl](http://www.jsmp.tl) no facebook: [www.facebook.com/jsmp.timorleste](https://www.facebook.com/jsmp.timorleste)